

四庫全書

集部

欽定四庫全書

御定歷代賦彙卷五十

典禮

太常賦

有序

元徐容

周禮司常掌九旗日月為常交龍為旂鳥隼為旟熊虎為旗龜蛇為旐通帛為旝雜帛為物全羽為旟析羽為旟旌其降殺與五路五冕同而其用各異故惟天子得建太常以祀天而臣子之有功者亦可書名於其上愚觀

周禮建太常之說有以見聖人謹嚴之至及觀太常紀功之意又有以見聖人崇報之情是用表而出之以為賦其詞曰

溘吾遊此春宮兮近天表之清光觀嚴簿之新儀兮揭日月而齊明雲容容以下垂兮風冉冉而上班樹以素錦之所綢兮截屹立乎長杠仰翬羽其若飛兮五采注乎旒頭貫繆上之蜿蜒兮十有二乎綴旒交龍光之上下兮爛昭昭其未收載兩曜以行空兮天之明兮九幽

維皇明之象天兮駕郊天之玉輅影搖搖於扶桑兮翼
六龍之飛馭恍上帝之照臨兮即予心之披霧苟予心
之未然兮直悵悵之烏兔亦何有於裨聰兮體無私之
容光茲先王之制象兮羌表鑒乎太常豈止為旌殊勲
之具兮示臣子之奉揚故大赤不得以比尊兮太白偃
乎其在傍矧木輅之大麾兮又惡得而抗行故繼戎不
得以褻之兮穆將愉兮上皇竊獨悲夫制之不古兮續
蜺旌與虎旂曳明月之神珠兮歆金景之紫旃羌徒侈

乎觀美兮捲蔽空之雲烟羸胡為兮匪郊兮壯東遊之
山川漢又用之求神兮且逮事乎甘泉矧麾幢之過節
兮又太侈於開元嗟太常之匪常兮用已失其度也增
五輅於十二兮紛不知其數也幸太常之復周兮輅乘
殷之制也孰不欣欣而相告兮願見羽旄之美也遂作
頌曰太常象明君之聰也太常紀績臣之忠也穆穆一
堂代天工兮保合太和時之雍兮彼美園丘在國之陽
兮交龍旆旆動日光兮天鑒在邇亦孔彰兮相德紀功

同其長兮微臣作頌敬獻司常兮

太常賦

元何槐孫

圓丘歲祀方澤薦馨華仗列星嚴蹕震霆先輅鳴鑾以
風動翠華移景而載臨樹旌麾之婀娜擁干矛之晶榮
絢爛乎通達摩盪乎員靈肅萬乘之威儀聳四方之觀
聽則有盛制是曰太常揭崇竿之巍巍曳垂旒之央央
長綵炳耀乎朱霞綢錦續紛乎素霜皓魄塗澤乎圓月
赤精繪綴乎太陽三五之日東西之方騰晶輝以互射

發瑞彩而相望不虧不昃儼亭亭於幅帛並明並昱恍
瞳瞳乎穹蒼樹羽飄飄以起舞繪龍天矯而交驤聯幅
之廣植材之良輪囷數圍之壯偃蹇百尺之長虎賁雜
皆以擁立欽飛奮迅而高張雨師蕩乎纖氛風伯清乎
康莊八神挾竿以踊躍雙鳳翼駕而翱翔窈窕綺旒翕
忽悠揚影盪大地光浮周行駢然而陰炳然而陽容與
乎大輅之間竦卓立之昂昂轆轤乎太清之表杳無依
之洋洋若乃華冕穆穆法衣皇皇重瞳屢回淵衷孔彰

載審厥象載瞻其光體大明之下照廓至聰之無旁洞
燭萬里丕冒八荒靡遐靡邇孰蓋孰藏且夫錫鑾之音
所以宣其心氣之中和繆苻之美所以昭其制作之文
章是則太常之建非特以眩耀乎衆觀蓋將以裨益乎
聖皇是猶取山鎮以琢圭璧法乾坤而作衣裳若乃元
老宗工崇勲偉蹟乃股乃肱維柱維石功洋洋以如在
名揭揭而中立庶瞻覽之不忘示眷顧之無數彼有圖
形於麒麟流芳於竹帛未若太常永在王室有美志士

觀光上國幸望屬車之塵願脩從臣之列共奔走於左
右覲威顏於咫尺稽周官之遺典參天朝之成式具鹵
簿之來儀表太常之殊飾庶幾千載之下仰皇猷於今
日

太常賦

元 劉文德

維聖神之智創心化工之範模河呈圖而畫卦風飛蓬
而成車仰天文而覽觀爛雲氣之卷舒攄精神於制作
為旂常之權輿肇蒼姬之繼統備儀物而誕敷五路駢

羅九旂散殊或異以色或分以圖繫太常之所建與玉
輅之同驅分三章於帝服揭二曜於乾樞合璧凝暈重
明應符恍廣寒之玉兔映扶桑之陽烏飛龍上下而盤
結綴旂晡藹藹而扶踈羽凝采兮陸離錦成文兮縈紆掌
之以司常之職建之於南郊之墟想其清蹕戒道和鸞
載途影拂瑤蓋彩聯玉裾園壇夜冷疑蜃氣之騰海黃
道塵清眩虹光之凌虛列星照兮婀娜清飈舞兮吹噓
上昭天象之同明旁挾神物而為徒乃有勲冠當世恩

流八區畢變稷契之事業伊傅周召之訏謨齊景鐘而
並銘倬汗簡而列書等山川之帶礪異麒麟之形摹示
褒揚於不朽豈徒偉竒觀於斯須彼龜蛇為旐鳥隼為
旗晉旆示威齊旌昭虞猶薰蕕與穹壤曾何足以擬議
而比論之歟慨古制之雖遠撫流芳其若初思獨埽於
筆陣拔先登之螯弧際明良而策勲矢予心而弗渝

黃目樽賦

以禮尚治情酌
中形外為韻

唐

李程

彝器之美黃目是尚黃者取黃理而中孚目者象清明

而外暢徽戴禮而有謂懿周人之是創將表敬於宗祧
必薦馨於鬱鬯爰設嘉名是用飾情彼因外而有制猶
自中而立誠酌於心終有假於圭瓚象乎目難取比於
兕觥必因樽彝爰佐齊醑以明大享之品物以助諸侯
之孝悌故以目而為名因酒而成禮爾其克脩祀典遐
本淳風將抔飲而體異等犧樽而義同殷薦有恒守遵
豆之列備用何所在宗廟之中追述作之深旨諒昭明
而有融用當其無物不為薄齊納金而飲酎等用茅以

明酌挹而未竭故不慚於金罍執而不揮寧有愧於玉爵立制有經創意圖形潔以新樽冀精誠之可達歆於明德知黍稷之非馨其象也則小取喻也斯大雖斟酌在中必儀形於外嘉其不泛不濫可繼可傳罔施丹雘徒假雕鐫詎同乎卮信乎美而無當豈比乎斗則有象而在天徒虛無以為說非潔芳以告虔甚矣哉前王之創物俾後代之相沿

黃目樽賦

以清廟之器所以禮神為韻

唐

裴度

聖人之制祭也因物達情比象配類盡內心之享禮定
黃目之彝器居樽之上察神之至黃其色保純固於中
央目以名洞清明於幽邃將以贊禘祫報天地成形而
百代猶傳徧祭而萬靈具醉懿夫周禮盡在殷薦孔明
鬱鬯馨而外達湛醪華而內清蘆落為用昭彰表誠自
可配於龍杓焉取儔於兕觥當其霜露盛時金石奏廟
告虔之始在物居要動明酌而曼醪騰光澄舊汙而圓
規納照且禮經所紀象設有以首瑚璉之序助宗廟之

美體含宏足擎蹠從祝之獻而如鼎之時精氣皎於外
飾黃潤豔於通理嚴敬而挹且見夫爵盈明德之歆詎
聞乎壘恥若乃遵豆並置陶匏共陳亦可以備觀光之
祭法攄素懷於蜡賓酌其中諒明明之取義華其晬將
屬屬以交神至如夜燎之時宿設之所含霜若麗夫金
質導氣更宜夫桂醕自合禮於宗彝匪齋名於杜舉是
知純嘏將降明禋在茲達臾陰於勿勿駐靈駕之僛僛
尚禮然也明王用之方今樂和同禮無體梁盛式務鬱

器光啓客有習於聲詩願奉樽而觀禮

象樽賦

以觀器禮
肅為韻

唐

闕名

稽太古之至薦也以汙樽抔飲除地而為壇迄後聖之
禮裡也其遵豆犧象咸飾其碧丹是以五禮秩經於宗
伯六樽詔典於春官實有嚴而有翼豈無取於異端故
殷王有彤日之祭魯聖有禘月之觀且皇周之享也肇
繪象於茲器既普淖於式潔乃登堂而奠次耀如金石
以率舞派若洪瀛而鼎肩騰圭瓚以沃暢達羣神於玄

秘敬宗宜社以交其幽明返本歸仁以尊其天地可以
等上下之列可以參陰陽之位豈齊夫斗筭之外役寧
假乎挈餅之凡智憤季氏之將旅恥王孫之寧媚況今
交節以義具物昭洗介茲壽考以洽百禮柔嘉滌濯以
脩其虔恭登降揮觶以流其愷悌夫禮以器成器以禮
肅擬冰壺之潔徹鑒膳鼎之覆餗望堯衢而感惠賴嘉
時而有淑既無列野之郊願致誠於工祝

秬鬯賦

元 楊維禎

曰若稽古烈山氏兮農用天下百穀利兮彼美靈苗非
簾芑兮一稔二米獨異秬兮聖人有貴取為釀兮和以
鬱金汎醖盍兮汁獻出香芬其暢兮臭以達陰鬯實尚
兮酌彼黃流輝玉璫兮社壇崇門疊瓢展兮凡裸凡醕
有概散兮或嚴大肆共其泔兮掌以鬯人美潔誠兮孚
於上下通三靈兮思昔公旦卣有命兮詞曰明禋禮何
盛兮召公維翰繼受釐兮文侯捍艱亦受賚兮晉侯再
拜敢忘君之賜兮彼魏公九錫何休命之悖兮吁嗟柅

豎生世世兮薦德報功我思古之制兮

太羹賦

以宗本誠敬遺
味由禮為韻

唐
施肩吾

至敬尚潔在禮惟恭饗異四時太饗以先王為裕羹重
五味太羹以無味為宗薦既殊於禘祫禮乃變乎秋冬
則知此祭不數此羹不混法明水以成功惡鹹醢而是
損義由反古類橐結之無文道尚全真喻恬淡而為本
故宜輕八簋黜三牲其味唯德其色唯清若謂我在物
則物不在於鹽菜若謂我在水則水不在於汙行小周

人之尚臭哂殷家之貴聲雖無形而可挾務展禮而由誠觀乎一鼎無包百王是慶法君長以為尊事鬼神而聽命既陳既酌彌重乎精誠不絮不調莫先乎聖敬聿脩前典不可度思因七獻以成禮約三歲而為期饗讌既終於勿勿禮容方盛乎遲遲且在有名而可重孰云無味而見遺是以不饗甘苦不由饗餼清雖假於一烹用不因乎多味澄渟在潔惡薑桂以為滋肸鬻降靈歆明德以為氣是以禮因羹而克舉羹因禮而允脩乍同

西伯之禴寧比東鄰之牛一以表專一而不二一以表
通微而闡幽豈徒不和而為貴亦以明反本之所由懿
夫其名類鍊其正在禮下以敎人倫上以親祖禰苟傾
覆之無虞諒威儀之由體者也

明水賦

以泠然感化潔
我蒸嘗為韻

唐
崔損

大饗之禮明水攸先其水也所以本太古之淳樸其明
也所以享至敬之昭宣從朗月之潛化應陰燧而通玄
暗度晴空泛銀河而色靜曉臨清廟浮玉露而光鮮既

潤下以功博亦就濕而義全冥兆朕於至理契幽微於
自然加五齊而致獻首三酒而告虔觀其象在乎天德
包乎坎類影響之相名協陰陽之應感其禮斯節其色
斯潔不假縮於苞茅復何施於麴蘖將汙樽而並用與
越席而齊列或異乎勿幕有孚豈比夫不食而潔皛皛
熒熒清清泠泠明德為馨神人是聽從無味而有味自
無形而有形深源莫測實資造化濯桂影於遙天洗蟾
光於永夜懿夫昭潔著贊溉賞常蒸宜玉笋之見貯匪

金盤之見承若乃鼎俎備設嘉羞衆夥苾苾芬芬名之
莫可尚其本也知享獻而靡他貴其新也諒斟酌而在
我於維巨唐穆穆皇皇崇初祀異蒸嘗玄酒乃薦至誠
允臧天降其福地出則祥醴泉洋洋明水是將徹慶雲
之色映瑞日之光羣臣作頌歌孝治之無疆

明水賦

以玄化無宰至
精感通為韻

唐夏稜

祭祀上潔精誠克宣伊明水之為用諒至誠以為先積
陰以成符嘉應於冥數以鑑而取感無私於上玄將假

以表敬式彰乎告虔皎皎泛月灃灃降天既稟氣在陰
亦成形於夜有無雖繫於恍惚融結寧隨於冬夏明者
誠也我則暗然而彰水惟信焉吾非倏爾而化徒觀其
清霄霧斂朗月輪孤鑒清瑩而類鏡水滴瀝而疑珠混
金波而共潔迷玉露而全無感而遂通配陽燧之為火
融而不涸異寒氷之在壺彼既無情此何有待始同方
而合體寧望遠而功倍故能佐因心於霜露均潤下於
江海有形有實徒加以強名無臭無聲孰知其真宰是

以昭其儉潔其意含水月之淳粹脩粢盛於豐備作玄
酒而禮崇登清廟之誠貴啍潢汙之野薦陋甘醴之莫
致祀事孔明其儀既精無朕而有不為而成二氣相臨
本自蟾蜍之魄三危莫比殊非沆瀣之英至道自玄而
兆醴泉因地而生原夫月麗於天水習乎坎物有時而
出故方諸而夜呈事有朕而因故陰靈而下感大滿若
冲其來不窮風塵莫染其真質天地不隔其幽通况國
家崇儀初祀薦敬旻穹方欲行古道稽淳風客有賦明

水之事敢聞之於閔宮

明水賦

以玄化無宰至
精感通為韻

唐
歐陽詹

智之不測有明水焉方諸在手圓月居天象質遐分則
迢遙而迴遠精華潛合遂滴瀝以留連可謂妙有斯妙
玄之又玄茲道也自何而來彼至也從何而借越杳杳
之蒼昊滋遙遙之永夜望蟾魄而光彩殊流端蛤形而
清泠忽下等陽燧之通感實柔祗之閔化豈非月包陰
德蛤乃陰餘英精合契氣類相符共稟坤而配坎諒交

律以有濡是理也自取之乎必有斯水也遂生之於本
無精潔可嘉清明斯在湛玉露以無垢入犧樽而有待
處曩實爵今則由於塗人置下升堂以不聞乎真宰觀
其所自原夫所致臨庭目擊雖從陰鑒而來向月心祈
允似上天而至來莫我繫至莫我精棄本不仁故存名
而曰水從儀酌號遂表性以稱明信可薦宗祏祈上清
是故祭先展敬類帝昭誠首三酒而上獻掩五齊以先
行招百神之景福致萬姓之元禎無益於人鄙玉漿於

夜漏自求其溢，晒珠露於金莖。遊原習坎，固有旁感處。
陸騰空，不無玄通。龍吟雲而致雨，虎嘯谷以來風。動無
千里之燠，潤纔百里之功。豈若以握中之瑣細，映天上
之腫脹精液，下融神人以崇而福祿攸同者乎？

明水賦

以玄化無宰至
精感通為韻

唐
韓愈

古聖人之制祭祀，必主忠敬。崇吉蠲，不責其豐。乃或薦
之以水，不可以瀆。斯用致之於天，其事信美。其義惟玄。
月實水精，故水其本也。明為君德，因取以名焉。於是命

烜氏候清夜或將祭圓丘於玄冬或將祭方澤於朱夏
持鑒而精氣旁射照月而陰靈潛下視之不見謂合道
於希夷挹之則盈方同功於造化應於有生於無形象
未分徒逞離婁之目光華暗至如還合浦之珠既齊高
於醴酒詎比賤於潢汙明德惟馨神功不宰於以表誠
潔於以誠荒怠苟失其道殺牛之祭何為如得其情明
水之薦斯在不引而自致不行而善至雖辭麴蘖之名
實處樽罍之器降於圓魄殊匪金莖之露出自方諸已

似鰲人之波將以贊於陰德配夫陽燧夜寂天清煙消
氣明桂華吐耀兔影流精聊設教以取水伊不注而能
盈霏然有象的爾而呈始茫茫以霜積漸微微而浪生
豈不以德叶於坎有類則感形昭在空氣應則通鶴鳴
在陰之論不謬虎嘯於谷之道可崇庶令知聖真之無
黨驗天地之至公竊比太羹之貴味幸希薦於廟中

明水賦

以玄化無宰至
精感通為韻

唐
陳羽

彼美明水含精自天孤影流輝乃凝空作潤萬靈來享

故為酒稱玄所以貴新滌慮殷薦告虔水本涵清表至
深之心著明以比德惟馨香之義全想夫含氣遙空成
形永夜出陰鑒則凝清自美對明燭則搖光相借至誠
所感同就濕而流大饗是資若待神而化斯可謂至精
無朕明誠有孚泛清月而乍融乍結洗輕煙而若有若
無潤而鮮見湛露之濡金鏡晶乎潔類清水之在玉壺
至若高天委秋皎月分彩氤氲既合精粹斯在方昭德
以降神異趨下而歸海是知嚴而敬者其德大潔而祀

者其福倍繫景命之不渝豈成功之不宰原夫明水之
初化也天子齋心司烜歲事望靈月露陰燧皎晶浮光
清泠在器自無而有知靈化之不測應感而來知神物
之斯至其或崇國祀設方明備禮樂潔粢盛用陶匏之
器薦繭栗之牲秩神祇而配坐望天地之含精匪明水
而神不降無明水則祀不誠是以明處作離水居為坎
諒明水之潛化本陰陽之所感其名也合五行之德其
用也冠三酒之功泊爾味淡凝然色融至馨無臭至潔

含光則是水也與靈物幽通

明水賦

以玄化無宰至精感通為韻

唐 闕 名

明水之設其義斯玄水以潔著明由色宣神靈是享祀
典攸傳遵豆靜嘉取其濯漑麋不用存乎吉蠲審靈
變之無方實太陰之相借月當盤而冥名水承月而潛
化冲融其色連桂影於晴空泛濫其光映銀河於永夜
理包幽奧質本虛無在洞徹而彌朗介清明而不汙冠
澄酒之奠禮其式序方行潦之酌亦實有殊懿夫淨透

霄光遠浮星彩取之不竭從而不改彰至敬而用協神
心兆無形而道符真宰信體微而義博知事簡而功倍
當其配饗宗祧告成天地壇壝廣設粢盛大備爰命司
烜聿持陰燧月晃朗而遐臨水漚潛而潛至既清既潔
表勤昭事之心克誠克明載展奉先之意原夫物以類
聚應因感生水惟坎德月實陰精所謂聲同即應氣合
乃并行之斯行且比夫流而不滯止之斯止亦似乎滿
而不盈徒觀夫皓魄淒清湛然澄澹出於朕兆形乎有

感國家蒸嘗是奉享獻惟崇明水載挹至誠遂通始分
素魄之下俄傳清廟之中應召而生寧假挈鉞之智順
時而委宜煩汲井之功固將降肸鬯於純嘏表虔恭於
聖衷者哉

陽燧賦

元史駟孫

嚴邦家之祀事稽禮文於故典匪精誠之潔著辭能無
乎不忝犧牲牲牢卜具三月之滌酒醴粢盛躬藉千畝
之甸水陸取四時之和遵豆備物產之遠蕭茅明潔而

致玉帛誠敬以展雖肅肅以顯相濟濟蹒蹒而陳饌
瞻盡禮與盡物宜神明之可交惟聖人之示法俱內心
之靡昭曰盛德而體物豈貴多之可報必也推陰陽而
致類求絜氣以明燭仰離明之麗天畜陽火以發育庶
可取以設燎敷神光之煜煜乃運獨智命工制器其器
伊何寔曰夫燧諒范金之形似效規燬之象義匪四時
之鑽改蒸樵薪以供饋司烜命氏職掌廼專吉卜既戒
曷敢弗虔候若木之揚輝攬羲馭以行天屏翳深遁而

雲斂沆瀣澄沐而景鮮乾端坤倪俯仰呈豁神司靈守
拱揖後先於是展襲出燧瞻對虛碧天陽一加晃蕩洞
射回旋交映炫轉的皪縷祥煙之氤氲歛朱光之赫奕
敢誇妙於人巧寵靈貺之天錫配方諸之明水符造化
而為匹然後敬以將之饌陳是照炳蕭合馨燔牲同燎
若乃圓丘展事長宵未曙列宿俯垂而收芒長河避影
以韜素覽陶匏蒲秸之陳粲然在目又何數乎田燭之
載路至於宗祀大饗逮闔風興鼎鼐駢列俎豆紛紜執

事有恪百辟降登無微不著靡幽不明煌煌晰晰自堂
徂庭祀事孔昭大禮用成斯聖人因天事天之一事而
著厥誠者也雖然器有其義感有其理胡金鑑之一規
致離明之交濟蓋以五行之運本乎二氣或取資於相
生或洩過於相制故金木皆能致火而祀事則以得之
天陽為貴耳厥今泰定治成禮樂斯興惇誨故老究覈
研精一物不備雖微必徵矧郊祀之所需寧舍之而弗
明賦陽燧以呻呬愧書生之乏能陪甘泉而頌封禪固

將屬筆於子雲長卿者乎

陽燧賦

元 馮翼翁

伊大塊之播物妙塊垓於洪爐渺二氣之充塞兆五行之感孚坎離互而成體水火激而相須倘積油之有微亦焚塊之非誣羌東風之扇物散仁氣於柳榆彼鬱鬱之何有乃炎炎之一初布束緼於代序易茹飲而粒蔬信物理之有待感燧人之權輿維司烜之有職述創巧於智餘廣昭晰於明裡陋尋常之布除仰大明之昭揭

實至陽之精儲湧金鉦之矐矐納外明於內虛煉金錫
之溶漾較分劑於錙銖潔治舍以熏沐達巧思而躊躇
掇和璧於內範鏤蟠螭於外模匪波光之凸起異奩照
之平鋪瑩磨淬於中容鑑纖塵之有無映虛勾於斗室
亘紅光之發舒試流曜於當空跌倒景之陽烏日規亭
亭而下照爛沈淵之赤珠晃洞射以交貫忍凝睇於須
臾手執熱而誰濯指傳薪而孰噓致潔氣於高煙散明
燭於齋廬煥鼎俎之陳列朗籩豆之孔殊光陸離於豐

盛影蕩漾乎清酤散餘彩於庭燎鸞聲鏘兮夜何如龍
旂舒而欲煖恍初日之當隅神續續而來御靈剡剡而
與俱彼太一之容與愧仙藜之自扶豈爚火之足矜實
離明之繼數即一事之明潔知百禮之勤劬即一誠之
感召來萬福之報腴宜分職之微賤列聖人之禮書倘
推類以盡物驗陰陽之理符彼溫濕之異就實同氣而
相於仰明明之如月想露滴於秋蜨攀桂花而雲征孰
與揭鑑於當途昔賢之賦明水抑虎變而龍舒欣援筆

而浩蕩願沐穎乎方諸

陽燧賦

元
吳朝陽

繫人文之未宣隱大朴之淳質爰燔黍而捭豚亦未知
夫火食迨往聖之迭興益有光於前昔廼制物以利用
昉教民之炮炙或鑕木於四時或擊頑於山石是皆創
制之人為而未知造化感通之極也若夫日為衆陽之
宗火稟純陽之德象離麗之中虛配乾行而不息煜萬
物而炳靈烜庶彙而生色淪精則畢照於幽隱揚彩則

發揮於動植雖窮示之漠然而潛通之有術乃氣類之
相感非臆見之所能測方其祀事將嚴宿燎斯設濟濟
在庭穆穆布列欲眩晃於饌陳致昭然之明潔乃命烜
氏出火鑑迎初陽之既升挹餘光之清湛爾其六龍飛
馭以整駕跋鳥振羽而高翔既分曜於若英亦洗華於
扶桑凌中天之倒影粲下土之長芒金燧斯暎祥煙有
輝泐然符合之妙冥然感應之機非木生之兆朕乃陽
變之熹微異託物之騰燄蓋流光之凝輝也於是對越

駿奔肅雝顯相儼煌煌而在旁仰赫赫之臨上堂陞以之而昭晰衣冠以之而宣朗臣民以之而雍熙天地以之而淳塗與明水而並陳驗陰陽之嘉貺將信祝而合祛若宴好於肸鬯且其為用也非世俗技巧之工乃今古法度之器合天人之至和並璋瓚之上瑞雖用舍之有常亦待時之斯致豈暗室以中藏實明廷之弘義矧熙洽之治朝德無遠而不被袂羣文以迓衡歲升中之禋事庶圖牒之洽聞將符貺之委致掄微材以效竒斯

殷薦之大備尚希寘於宗廟庶不遺於遐棄賦已又從而輯之曰大明麗天貞萬國兮聖人出治爰取則兮朝事聿嚴羣率職兮有器於此傳古昔兮命曰陽燧取火於日兮用致明潔饌陳孔飾兮昭明有融上下降陟兮純嘏億萬年永垂式兮

菁茅賦

明 王儒真

草木之生於天地間者槩乎其類或有繁葉而踈枝亦有深根而固蒂飽沾雨露之恩足感陰陽之氣叢本則

殊榮枯有序是以薰蕕之不同因其品名之各異惟茲
苞茅生而異類一莖三脊拔乎其萃曰芬曰芳為祥為
瑞著乎禹貢之辭產乎沅江之地春祠秋嘗備供王祭
於是朝廷所用有司加意督工栽種培植盡誠春則長
養禁護慤慤夏則採拔浣曝輕精虔恪包匭驛傳遞程
衆官拜送是用進呈貢以宗祀之用及沾鬱鬯之榮裸
假縮酒薦享克誠於獻此茅之為美也其質甚輕故用
之為祭也其禮至重蓋繫辭既有白茅之藉用春秋復

責苞茅之不貢聖人巨筆猶車輪之曳踵嗟夫聖人制
禮先王身修歷代未泯萬世傳流作古今之儀範繼天
地之皇猷承流宣化與國咸休予是思之豈不踈踊述
其由泚筆記其功用以風其意彰以諗其衆勿翦勿伐
宜哉宜種冀其於萬斯年不失沅江之底貢

庭燎賦

以早設王庭輝
映華辟為韻

唐王起

王者崇北辰之位正南面之威赫朱燎以具舉列彤庭
而有輝助彼皇明可燭於夜色叶茲睿哲引曜於宵衣

信乎令典有作舊章不違當其冠劍鏗鏘環珮昭晰
我爭赴肅肅就列聽玉漏而未央仰紫宸而初蒸珠
旒將出方熠熠以星懸綵仗徐來已煌煌而電設九
儀稍布六樂爰分代晨光之昭曜雜佳氣之綢繆
騰輝於鴛鷺之行若離若合委照於熊羆之旅或友
或羣昭昭彰彰紫氣紅光聲明煜燁百物熒煌覩炎
上之有赫知臨下之無荒遠而瞻之謂焚裘之煙
昭儉於晉帝迫而察之似流屋之火呈瑞於周王
金釭莫齊銀燭非競長風

乍拂高燄彌盛華袞燦爛以相鮮猛虞搜拏而交映其
容烈烈其明杲杲附寒者覺其春深假寐者疑其曙早
則知統四海朝百辟勵夙興勤夕惕佐盛儀而有待惜
流光而無數昭其明也叶天鑒之清穆望而畏之契天
威之咫尺彼燿火秦舉神光漢覲何足示來儀之容呈
八觀之績則知我皇立人之程為國之經旂澤澤而咸
造鸞鏘鏘而可聆萬宇又多士寧豈徒美君子之至在
宣王之庭

庭燎賦

以天覆之廣文
德以來為韻


唐

楊 濤

王者親政以虔遜明於未明之前佇來朝於昧爽爰設
燎以光宣爛然見舉赫以相鮮燧人載馳俾流光而燭
地羣后咸造將辨物以朝天時也四照方陽千官是候
星尚泛於銀漢夜未窮於玉漏烘廣庭之際施以朱陽
曜紫微之傍皎如白晝伊有爛之通照契無私之光覆
於是逮其時灼其姿影搖丹檻光動彤墀凌霜氣而炎
威轉熾拂輕颺而委燼潛遺設必有因蓋欲司其明也

幽無不察豈假望而畏之事光乎國典詠美乎周詩如
是則稱蘭膏者自滅影於是夜言金釭者敢呈暉於此
時豈設王庭其照能廣既烈烈之傍達亦勤勤於睿想
尚早斯至激環珮以鏘洋居高匪遑燭宮闈而矚朗功
殊旬燎事美蘭薰焚五夜而幽明已辨輝九重而鵲鷺
斯分小投矩以流景啗衡璧之呈文息其燄而恒讓朝
日浮其煙而乍雜瑞雲有以啓天顏輝至德燐亂炳煥
燐煌翕絕連珠戶而散彩暎丹桂而混色懿夫勲烈有

融用舍合理當其晦可燔熱以生讓其明可撲滅而止
原燎縱而奚匹燿火通而何以未若茲燎之舉天庭之
隈可使九門洞啓諸侯畢來



欽定四庫全書

御定歷代賦彙
卷五十

御定歷代賦彙卷五十

欽定四庫全書

集部
御定歷代賦彙卷五十一

詳校官檢討_臣劉 炳

主事銜_臣徐以坤覆勘

總校官編修_臣 王燕緒

校對官中書_臣 陸 湘

謄錄監生_臣 呂爾禔

欽定四庫全書

御定歷代賦彙卷五十一

典禮

藉田賦

晉
潘岳

伊晉之四年正月丁未皇帝親率羣后藉於千畝之甸
禮也於是乃使甸師清畿野廬埽路封人壝宮掌舍設
栢青壇蔚其嶽立兮翠幕黜以雲布結崇基之靈址予
啓四塗之廣阡沃野墳腴膏壤平砥清洛濁渠引流激

水遐阡繩直邇陌如矢蔥惺服於縹輓兮紺轅綴於黛
耜儼儲駕於屢左兮俟萬乘之躬履百僚先置位以職
分自上下下具惟命臣襲春服之萋萋兮接游車之鱗
鱗微風生於輕幘兮纖埃起於朱輪森奉璋以階列兮
望皇軒而肅震若湛露之晞朝陽兮衆星之拱北辰也
於是前驅魚麗屬車鱗萃閭闔洞啓參塗方駟常伯陪
乘太僕秉轡后妃獻種稂之種司農撰播殖之器挈壺
掌升降之節宮中設門閭之蹕天子乃御玉輦蔭華蓋

衝牙錚鎗綃紉綵縹金根照耀以炯晃兮龍驤騰驤而
沛父表朱玄於離坎飛青縞於震兌中黃曄以發暉兮
方綵紛其繁會五輅鳴鑾九旗揚旆瓊釵入蕊雲罕掩
藹簫管嘲啗以啾嘈兮鼓鞀礧隱以砰礧筍簴嶷以軒
翥兮洪鐘越乎區外震震填填塵驚連天以幸乎藉田
蟬冕頽以灼灼兮碧色肅其芊芊似夜光之剖荆璞兮
若茂松之依山巔也於是我皇乃降靈壇撫御耦游場
染屨洪縻在手三推而舍庶人終畝貴賤以班或五或

九於斯時也居靡都鄙民無華裔長幼雜還以交集士
女頌賦而咸戾被褐振裾垂髻總髻躡踵側肩拊裳連
袂黃塵為之四合子陽光為之潛翳動容發音而觀者
莫不抃舞乎康衢謳吟乎聖世情欣樂於昏作兮慮盡
力乎樹藝靡誰督而常勤兮莫之課而自勵躬先勞以
悅使予豈嚴刑而猛制哉有邑老田父或進而稱曰盖
損益隨時理有常然高以下為基民以食為天正其末
者端其本善其後者慎其先夫九土之宜弗任四人之

務不一野有菜蔬之色朝靡代耕之秩無儲蓄以虞災
徒望歲以自必三季之衰皆此物也今聖上昧旦丕顯
夕惕若慄圖匱於豐防儉於逸欽哉欽哉惟穀之恤展
三時之弘務致倉廩於盈溢固堯湯之用心而存救之
要術也若乃廟祧有事祝宗諏日簠簋普淖則此之自
實縮鬯蕭茅又於是乎出黍稷馨香旨酒嘉粟宜其民
和年登而神降之吉也古人有言曰聖人之德無以加
於孝乎夫孝者天地之性人之所由靈也昔者明王以

孝理天下其或繼之者鮮哉希矣逮我皇晉實光斯道
儀刑孚於萬國愛敬盡於祖考故躬稼以供粢盛所以
致孝也勤穡以足百姓所以固本也能本而孝盛德大
業至矣哉此一役也而二美具焉不亦遠乎不亦重乎
敢作頌曰思樂甸畿薄采其茅大君戾止言藉其農其
農三推萬方以祇耨我公田實及我私我簠斯盛我簋
斯粢我倉如陵我庾如坻念茲在茲永言孝思民力普
存祝史正辭神祇攸歆逸豫無期一人有慶兆民賴之

藉田賦

唐闕名

帝王之德無以加於孝乎惟孝之理惟農是先我上皇
傳璽之二載聖主飛龍之四年日在陬訾祇事於九宮
之位時惟戊巳躬耕於千畝之田祥風發於耒耜瑞雪
掩於郊鄺萬姓顙顙若百川之朝海九宮濟濟如衆星
之麗天帝乃儼然蔭華蓋被袞服戴冕旒佩瓊玉朱紘
炯以照燭藻綵紛其繁縟敬齊之色既肅肅以雍雍禮
樂之容亦皇皇而穆穆於是出甲乙之帳命先農之官

設庭燎而晰晰陳量幣而戔戔旌旄夾於翠幕簋簠列於青壇然後華鐘撞焚燎舉馨香發乎聖躬烟煴感乎寰宇常伯撰播殖之器宗人掌牲帛之數既金石而間陳亦籩豆而靜旅晨先漸朗湛露初晞告九天之事畢將三辰之禮依帝猶懷神農之務稽想伯禹之彊理一日於是躬耕二之日於是舉趾秉耒耨而顓若駕鐵驪而禮矣將致美於粢盛遂盡力於耘耔望農祥之晨正知土膏之脈起所寶惟穀故大飲以勞農所貴惟人

故躬耕以悅使俾夫三時不奪六府咸修遂放牛於藪澤還却馬於田疇道方齊於雨粟化實遠於焚裘務穡勸分顧勤於稷禹授時度地彌甚於殷周職乃分於九鴈政不逮於諸侯豈非人和而物阜亦將力穡而有秋是日命丞相巡行山林道達溝瀆因物土以分宜隨川原而刊木畫為九野教種百穀實萬代之儲址況九年之所蓄猶以為不躬不親庶民不信降趨車以徵求發紅粟以恤賑綈弋不加於嬪御茅茨永慕於堯舜祭惟

司嗇蠟必田畷即異畝同穎豈獨瑞於往年象耕鳥耘
是錫羨於今運適有田父起而歌曰畇畇千畝兮理有
疆濟濟千耦兮稷既良躬三推兮供神倉分九扈兮應
農祥染盛普淖兮潔敬斯皇神之聽之兮將登穰穰

藉田賦

唐
李蒙

採為耒耜為耜取其象也遠矣農為本食為天惟其利
也大焉聖人利器致豐躬親莫重於稼穡軌物勵俗敦
勸克厚乎率先於以奉神祇昭報之誠達於以祈社稷

孝享之德宣則躬耕之義也從古已然然皇帝勤惟國本
欽若人天所務惟農順動而取諸豫所寶惟穀時行而
應乎乾洎正月之吉日將有事乎昊天列千官於近甸
屯萬騎於遐阡當是時也其祭不戒而宿設其工職兢
以先後大禮備兮和樂陳嗇夫馳兮庶人走帝乃服蔥
韃乘御耦我疆我理禮正於三推必躬必親義存乎千
畝四輔冢宰六卿近臣大夫師長之族都鄙華裔之人
聖有作兮萬物咸覩人胥效兮天下歸淳且圖墮者於

其豐防險者於其逸有備所以無患克勤是用終吉三
推之禮廢則倉廩以之虛肆青之恩廢則簡書以之佚
欽哉欽哉能事斯畢夫然則農功可大農扈允臧以農
為本兮國有常令以農率下兮人知向方亦既奉宗廟
亦既備蒸嘗一人垂訓兮萬國昌固有迷於日用于胥
頌美兮聲洋洋

藉田賦

以復收墜典以
期農祥為韻

唐
石貫

太皞御辰勾芒定位天子率躬耕之禮有司謹親載之

事以為帝藉斯闕皇猷久墜不修耒耜之功是墮染盛之義於是擇元日戒農期本千畝而敬矣齊三日以告之然後內外清謐上下肅祇文物之儀備列戈鉞之衛在茲猶窺紫禁共仰丹墀儼南面凝旒之所當東方欲曉之時漏水聲盡爐香上遲俄而閭闔開羽儀展揚青旗以肅事備朱紘而戒典上乃望靈壇御玉輦蒼龍整駕以前導蔥嶺遵途而右轉六轡齊舉八鸞啓行向綠野公田之所至青郊展禮之方紺轅塞路青輅巡塲叶

農經而授事指農正而告祥由是別土宜分疆理入滌
場而肆目撫御耦而舉趾遂乃執紅紉親儻耜四顧而
溝塍砥平三推而土膏脈起發生有在播殖茲始諸公
諸侯而次進或五或九而皆止見京坻之流行可期覩
稼穡之艱難有以禮樂既備人神告休事雖兆於東作
稔以見其秋收豈獨親耕於甸內實亦種德於道周羣
臣乃伏輦而進曰臣聞歷代務農百王重穀陛下興古
典之已墜紹前修之不復故得人勤稼穡天降景福帝

曰予上事天地次奉祖宗惟舊章是率惟古典是恭今將返鑾輅而宴於太寢又欲展禮而勞農

藉田賦

有序

宋
王禹偁

臣謹按周制孟春之月天子親載耒耜藉田所以事天地山川社稷先王醴酪粢盛於是乎取之恭之至也自周德下衰禮文殘缺故宣王之時有虢公之諫秦皇定霸鮮克由禮漢祖龍興日不暇給孝文孝景始復行焉昭帝弄田亦其義也後漢永平中明帝東巡耕於懷縣

非古制焉魏氏親耕闕百官之禮蓋草創爾晉武太始之年略修隆典宋文元嘉之代亦舉舊章齊用丁亥之辰梁以建卯之月後魏北齊沿革有異隋朝唐室文物可觀太宗行之於前明皇繼之於後自茲以降廢而不行將煥先農必待真主皇家享國三十載陛下嗣統十四年武功已成文理已定乃下明詔耕於東郊百執悅隨三農知勸禮官博士蹈舞而草儀甸師嗇夫歌詠而供職方拾遺直史館王禹偁再拜而颺言曰耕藉之義

大矣哉千畝之田三推之禮所以教諸侯而事上帝率
人力而成歲功實邦國之彝章皇王之大典昔潘安仁
賦之於晉岑文本頌之於唐今王道行矣王藉修矣神
功帝業煥其有光宜暢頌聲以播樂府謹上藉田賦一
章雖不足形容盛德亦小臣勤拳之至也其詞曰

十四年兮帝業遐宣寰區晏然乃順考於古道將躬耕
乎藉田務本勸農稽前文而備矣事神教養舉隆典以
行焉萬國歡心而懌懌百官供職以虔虔草儀注於有

司議沿革於遺編築壇墠之三陛開阡陌之百廛文物
聲名合禮經而有度旌旗衣服應方色而不愆既而屆
孟春擇元日太史先奏天子將出是月也道人徇路星
鳥中律當東郊之迎春是東作之平秩皇帝於是即齋
宮辭帝室戒錫鸞嚴警蹕乘青輅以有威儼朱紘而無
逸佩乎玉也懸黎之色蒼蒼載其旂焉干呂之雲鬱鬱
屬車負播殖之器後宮獻種稔之實紅縻黛耜服蔥蒨
以陸離縹輓紺轅駕蒼龍而飄歟太常之禮具舉司農

之屬各率甸師掌舍警御陌以惟嚴封人野廬設壇宮
而靡失於國之東千官景從風清塵而習習雨灑道以
濛濛時也木德盛陽氣充春芒甲坼青青兮蔥蔥春土
脈起油油兮溶溶冠蓋蔽野珮環咽風狀浮雲兮隨應
龍旂幟張日車徒塞空若衆星兮環紫宮修農事以惕
惕襲春服之重重爾乃配少皞祀先農尸祝無媿豆籩
以供太牢之牲薦之而肥腍太簇之樂奏之而春容於
是修帝藉勞聖躬撫御耦以無怠履游場而有蹤將循

乎千畝之制豈止乎數步之中耕鉤盾之弄田但矜兒
戲修建康之春藉未煥農功有以見萬乘之尊三推而
舍或五或九降殺之義有倫爾公爾侯貴賤之班相亞
嗇夫灑種以斯畢庶人終畝而告罷千耦其耕煥乎禮
成播百穀兮率人力歌載芟兮揚頌聲將見乎餘糧棲
畝腐粟如京神倉令納乎黍稷以備粢盛廩犧氏收其
藁秸用餉犧牲親畎畝兮化被重民天而教行自得訓
農之實非貪慕古之名然後下青壇歸絳闕百姓知勸

羣后咸謁在鎬之宴啓歌虞之音發獻萬壽兮歡呼奏
九韶兮鏗越開三面以行惠宥五刑而審罰恩流於孝
弟力田德被於雕題辯髮興五土之利固必躬而必親
同三代之風復不矜而不伐大矣哉藉田之禮豈三年
而不為躬耕之義將百代而可知我所以舉久廢之禮
定不刊之儀慮弗勤於四體將有害於三時務農桑兮
為政本興禮節兮崇教資民乃力穡歲無阻饑神農斲
木之功我其申矣后稷播時之利我得兼之供秬鬯以

斯在介豐年而有期丕顯事天之禮誕歌祈社之詩祀
山川兮神鑒明矣配祖考兮德馨遠而天錫純嘏用光
孝思乃作頌曰倬彼東郊公田是闢大君戾止言耕其
藉帝藉既修乃及公侯親爾來報勤爾田疇言采黍稷
祀於圓邱億萬斯年以承天休又曰倬彼東郊耕壇其
崇大君戾止言訓其農農功既督乃知榮辱爾家以給
爾人以足言奉烝嘗享於此屋億萬斯年以介景福

躬耕帝藉賦

明

顧鼎臣

帝在位之八載兮大業朗以遐宣闢兩儀以作宇兮掩
六極以為鄧四時肇其順序八政飭而罔愆惟東南兮
薄海暨西北兮窮邊莫不去氈裘而襲弁帶服鉉耒而
止戈鋌猶且邇王業之本念民事之艱憲古昔以示勸
躬往耕乎藉田是月也星麗辰角日移參尾太皞司辰
勾芒佐理律應夾鐘節惟雨水當木德之在馭見斗杓
之東指膏霰漬於原隰協風被於蘭芷林含煙以蔥蒨
華綴露而旖旎長川漾兮流碧芳草靡兮成綺倉庚忽

其有聲田務作而伊始羌萬井與千廛咸戒期於于耜
先是乃命司空治館金吾視壇行宮起乎國東制作準
於星躔周垣遼而匝地閣道絡乎中天絳殿崔嵬而耀
景燦闕岌業而凌煙華蓋螭翻而雙略旋廊糾結而蜿
蜒青幄儼其雲駐翠幕颺而氛連有觀稽之崇臺隆隆
崛嶭乎其間俯平疇於大野激流水於原泉闕方中兮
千畝亘四微予陌阡若天造而地設以待我聖天子之
幸焉爾乃即齋宮坐宣室儷朱紘戴青幘祝史正辭巫

咸獻吉瑤輅朝嚴金根宵飭服蔥瑯於紺轅駕蒼龍以
縹輓後車備播殖之器中宮獻種稔之實前旌裊裊依
然干呂之雲佩玉蒼蒼穆矣懸黎之色已乃勾陳肅隊
招搖啓途六軍雷動萬乘風驅叱豐隆而扶輶呼蒙公
以附車乍鳴鑾以颯駭倏揚旆而景靡青縞續紛於震
兌朱元飄颺乎坎離方彩錯其外列黃屋屹以中馳前
披雲以建纛後捎星而曳旂左絳縹乎撓旃右縑纓兮
洪頤恍天旋而斗運矧岳轉與山移爾其五輅方行九

門乍啓雉尾繞以朱輦望東郊而直指似太陽之初升
瑞靄分其抱珥既而屬車轡轡纖塵弗驚花飛飛以夾
路草幕幕而侵輪似青帝之時行品物鬱以芳新若乃
千官景從車徒塞空飛蓋結而如霞鳴佩咽其從風似
三垣之列宿旋繞依乎紫宮已而崇卑在列直廬周設
循芳甸而徐轉紛綺繡其如纈以應龍之迴翔玄雲藹
而四合若其塋曠天清和鑾有聲絲管啁啾以嘲哢鐘
鼓訇磕以砰砮似春雷之啓蟄震百里而皆驚至乃士

女咸集耄倪皆至盼翠華之來臨歡聲騰而動地似百川之赴海奔濤譎而聲沸爾乃享后稷祀天農奠蒼穀與玄醴燎芳桂與香蓊太牢薦而肥腍太簇奏而春容既用虔於裸鬯乃躬即乎田工於是京兆授鞭司徒獻耜巡沃野之墳腴望平壤之如砥儼洪縻之在御撫紂耒而成禮懷炎農之務穡想崇伯之彊理四顧而溝塍鱗次三推而土膏脈起諸侯諸公咸以班而遞進或五或九洎終畝而方止陟巍臺以遐眺觀萬民之舉趾一

人有慶既穆穆以皇皇百辟致辭復雍雍而濟濟大猷之典將行享禮之譙斯啓時則有大宗伯捧策而進曰臣聞民之天在食國之本惟民伊藉田之大禮實累代之攸遵善乎號公之言上帝之粢盛於是乎出民之蕃庶於是乎生事之供給於是乎在和協輯睦於是乎興財用蕃殖於是乎始敦龐純固於是乎成者也彼千畝之不藉固取誚乎麟經伊元嘉與泰始亦徒具乎彌文今我陛下應農祥而發令順陽氣以時行舉百王之令

典循列聖之法程藉千畝於畿甸勤萬乘以躬耕勸三
農以崇教本播四海而揚頌聲想餘糧之棲畝將腐粟
之如京載在國章既以示勤民之政藏諸御廩抑以薦
明德之馨大矣哉此之為禮蓋將邁前休而建極啓來
哲而為經者矣爾乃天子茫然而思覲然而嘻曰唯唯
否否卿知其一未知其二予竊感於茲行實有資於治
理是故邇陋井分遐畝繩直水縈帶以環注睇四封之
如一此亦予一人之奠域也霖雨如膏隕露如飴春苗

灑而綠淨秋隴滴而黃滋此亦予一人之施澤也菽藿
特畦禾黍異田任土宜而播殖亘廣陌與橫阡此亦予
一人之軌物也藝此嘉植殄彼蠹蟲刈稂莠使靡遺樹
蘭杜於近疇此予一人之樹德遠慝也盖黍稷馨香邊
豆以飭者孝之則也三時不違唯農是卹者仁之錫也
度土任宜深耕易植者政之式也天子所以念稼穡之
艱難躬胼胝而無逸雖六府之孔修猶日慎乎一日豈
止於奉遺典而遵修慕前文而潤色者哉於是上宰元

臣載拜稽首奉萬歲之觴上一人之壽鑄玉冊於金滕
勒鴻猷以垂後遂作頌曰於惟上聖轄化權兮洪澤滂
滴溢八埏兮百祀咸秩禮則虔兮迺藉千畝國之原兮
朱紘蒼佩造彼壇兮帝既至止三推先兮三公九事撥
以班兮厥禮既成兆民喧兮勾芒太皞覲而歡兮百千
雜遝扶轄還兮農用震動庶殖蕃兮粢盛恪共盛所蠲
兮穰穰其瑞應罔愆兮百穀膺膺大有年兮耒耜萬里
息戈鉞兮如陵如岡萬福駢兮登義越軒古無前兮天

子萬壽配彼天兮臣拜稽首頌斯言兮匪臣則文盛則傳兮

擬聖駕躬耕藉田賦

明 馬象乾

皇帝嗣服之七載也張天綱理地維恢帝驟廓王馳度
貞化協文恬武嬉滲漉周於遐邇威靈暨於華夷道德
媿夫堯舜治理躋乎黃義乃求掌故爰稽典儀文在茲
矣有其舉之維時夾鐘應候東作方謀陽氣上蒸土膏
潛流農祥晨正乎南極協風駘蕩於西疇勾萌達而桃

始華品類育而鷹化鳩天子茂對時物慨然思曰民生
在食國事在農時至事起天運人從循哲王之遺規步
上古之高蹤將率先乎萬姓奚安居於九重乃命宗伯
定儀司空除地甸師清塵田畯具器挈壺諏播殖之辰
僕御備啓行之騎於是金門初敞銅漏既殘旭日纔臨
湛露未乾天子駕翠虬御青鸞乘玉輅出金鑾服蒼龍
之袞戴朱紘之冠曳輕霞之寶箠捲揭霧之長竿夾道
陳而霓旌擁周廬列而羽騎寒六飛動而香塵起千官

護而珂珮珊珊觀翠葆乎天上儼黃屋於雲端爾乃遵紫陌以來思望青壇而至止念稼穡之艱難遡黍稷之伊始旅我邊豆饋我簋簋祇祀先嗇以綏福祉牲醴膾兮穀既登鬱鬯灌兮酒且旨祝史陳兮蕭艾升明德馨兮勾芒喜爾乃金絲迭奏鏞鼓偕鳴嘈嘈晰晰填填鉤鉤地官進耒天子躬耕紺轅黛耜蔥轄縹衡一墦而青陽動三推而黃茂生嘉種播夫種稂執事徧乎公卿一以勸稼穡一以供粢盛孝承乎宗廟仁建於編氓匹思文

之率育陋鈎盾之虛名張古今之緼典續帝王之休聲
爾乃大禮成勞酒舉皇情暢需澤普金罍列犧象之尊
角觝雜魚龍之舞玉管下鳳凰桂醕傳鸚鵡洽歡心於
百辟播盛美於萬古是日也屬車載路觀者比肩侍從
勲衛之臣星羅輦轂都人士女之衆雲集郊廛歡聲騰
而動地塵光起而蔽天咸舞忭乎盛世齊預卜乎豐年
及夫伶工徹樂有司告竣鴻卿唱畢鳳駕言旋佳氣浮
而九衢曠斂春風淡而雙闕霽煙羣工呼嵩者萬庶人

終畝以千天子猶凝神宥密養靜穆淵時咨者碩日御
細旃念有生之疾苦軫無告之顛連矇瞽進幽風之什
殿廷繪無逸之篇崇節儉則澣濯著議賑貸則逋負蠲
待凝丞若師保比誨䟽於韋弦無益之務戒於弗作不
急之官令在必捐宜乎仁聲遍九有恩光被八埏也重
曰於鑠維皇以乘乾兮既類於帝修藉田兮思樂甸畿
翠幕褰兮惟皇戾止萃輶軒兮親我穡事告犧牲兮執
耜舉趾遵遺編兮風行化馳覃幅幘兮禮明樂備信無

前兮赫赫中興過周宣兮

耕弄田賦

以宮裏為田勸率耕事為韻

唐

王 榮

漢昭帝之御乾時猶眇年能首率於農務遂躬耕乎弄
田理叶生知蚤識邦家之本事殊兒戲斯為教化之先
當其天駟既端土膏初起命開鉤盾之側將幸上林之
裏有司於是整溝塍修耒耜別置膏腴之所取法百廩
旁觀齷齪之間如方千里帝乃駕雕輦出深宮展三推
而不異藉千畝以攸同且曰朕位極元首身慙幼冲每

訪皇王之業無先播殖之功未遂躬親於彼神臯之內
聊將樹藝於茲禁苑之中然後俯天顏擁農器向畎澮
以懋力對鋤耰而多思豈無宴樂不如敬順於天時亦
有遊畋莫若勤勞於農事是則非同學稼粗表親耕既
留心於東作寧無望於秋成環衛近臣盡起西疇之興
宮闈侍女微生南畝之情於時稼政既修稻人是率千
牛之列有序九扈之官咸秩神農舊務嘗廢於他年后
稷餘風復興於此日嘉夫戲或是戲為勝不為審殷阜

之由此知艱難之在斯自昔庸君多昧三時之務惟茲
少主能分五地之宜故得教化下敷皇猷上建人忘荷
鋪之苦俗有帶牛之願因知翦桐葉以命封未若耕斯
田而天下勸

千畝望幸賦

以將興隆典允
屬聖期為韻

唐
闕名

國重農事帝遵時令惟千畝之可親望三推而闡盛田
畷方勤於稟法甸師已切於承命陽和初布庶平東作
以勸人逕術既端終俟南郊而見聖當其融風式協韶

景方遲金根為順動之馭莒葉表親耕之期度以地狹
難容足列公車之數顧其土膏潛動可陳農器於茲脩
隴惟直遐阡甚夷是宜率諸侯大夫以行乎周禮不可
使四年正月獨稱於晉時言瞻耒耜志惜墳衍謂昀昀
而足得天臨想澤澤而正宜春淺空為散地尚鬱新典
載芟未及勾萌之出何因一塏為期螻蟻之誠願展翠
幕猶閔朱紘未至當人力可借而成功使農祥失正而
奚利染場之履期刻刻以輕移撫藉之衣想襜褕而如

墜且夫事遵禮動法貴聖興顧井田之君是可出而偕
作懿初耕之帝宜其德以相成不然則無以知土宜慰
人欲使其種稔克備粢盛乃足庶見其耘之耦一一具
陳必報乃求之倉囷囷交屬況以近甸堪樂元辰以良
借百步之疇冀停雲罕修三班之令期在月將如此則
樹德咸滋訓農惟允畢力克符於地事致誠不昧於畦
畛儻禮備而必行實以表乎仁之至義之盡

蘭館賦

元劉 聞

繫坤后之奠位德上配於乾剛宜尊安之莫媿匹垂拱
於無疆嗟勉勉之靡寧兮豈先勞於嬪嬙立婦道於天
下兮匪至勤其奚彰當時物之代遷兮撫春熙之載陽
感戴勝之和鳴兮矧柔桑之遠揚豈不思夫逸豫之為
娛兮念蠶事其敢忘飭妃御以同心兮尚服勤於懿筐
彼蠕蠕之微生兮初若有而若亡羌繽紛其日滋兮亦
蛸蛸而有行忽三旬而獻功兮儼管籥之是將慚內職
之賤微兮近君后之清光后翼翼以祗承兮曰三盆之

有常斯繭館之有典兮匪漢志之荒唐瞻內地之深嚴
兮鳳幄騫而高張綺䟽散彩於雲霞予文棟比隆乎穹
蒼挹和薰於上苑兮分淑景於長楊當后車之戾止兮
芳菲菲兮滿堂肅佩珥之環拱兮擁翟掄而煌煌非煙
郁其若烝兮探寶鼎之蘭湯悅曙星之磊磊兮浴紋波
之微茫祭玉潔以金輝兮眩滿目之天章手其盆而逾
恪予不敢亟其敢遑禮有數而恐瀆兮心與縑而同長
曾畢事之憚勩兮想專能而廢讓願相成之在下兮加

黼黻而青黃被玉體以無數兮穆將祀乎先王豈寸絲
之為潔兮致吾皇之齊莊庶神鑒之不遺兮荅靈貺其
穰穰與六合以同釐兮賴一人之壽康揆爾館之禮意
兮嗟漢氏之未詳惟茲禮之有初兮抑嘗稽夫公桑與
藉耕以並列兮豈但警夫怠荒昭勤敬於人神兮罄厥
忱而巨量慨墜典之僅舉子何古風之涼涼彼弄田之
有耕兮徒游玩於未央矧掖庭之與邃子曾女紅之未
嘗宜爾館之盛制兮不與蠶室而同臧撫壺化之寥寥

今徒頌美於永平之椒房也

繭館賦

有序

元楊 撝

古者天子躬耕以供粢盛后親蠶以為衣服重祭祀也
漢之時躬耕之典常行親蠶之禮亦具則視以為勸農
桑之本藉田前有賦之者矣則繭館可不賦乎賦曰

若稽古昔禮重親蠶后受獻繭手盆者三固所以重祭
祀之服亦以敦裳衣之原維繅繭之有館歷古制之未
聞想其密邇公桑旁達內宮層構突兀迴窻玲瓏靚深

邃窈廓其有容風薰薰兮南來日融融乎西東夫人世
婦被之僮僮夙夜匪懈服勞其中雖主后之尊寵亦志
存乎女紅方春日之載陽桑柔柔其初綠念蠶事之當
興早已勤於被浴曾日月之幾何羌成功之我告服其
禕服載祇載虔保姆左右師傅後先鏘珣璜兮琚瑤儼
神明之在前違詩書越圖史造繭館畢蠶事爰舉首而
旁觀爛芳繭兮盈目或黃如金或白如玉嘉爾勤勞我
寧不勗繅所獻之毫芒手三盆而奚足曰禮制之孔嚴

恐過之而反瀆爰分布於諸宮俾綵繭而獻之告吾君
以成事命夏人而染茲夫以天下之大奉一人之私亦
有篚纊亦有貢絲何瑣瑣以爭利得無愧於去織之公
儀黼黻文章繡裳袞衣於以享先王於宗廟祀上下之
神祇昭誠孝於無斁皆待是而有為豈無禽也必親獵
以登俎亦有黍稷必躬耕而盛染匪盡已以致潔寧吾
心之敬虧君不能以自蠶茲誠后之責歟雖三縑之不
難要役志之在此俾吾民之有聞亦戒飭其婦子以至

尊而忘勞況吾曹之貧窶成天下之疊疊將不能以自
已家衣帛以忘寒疇無衣以卒歲誠興利之善機詎去
織之可擬慨兩漢之舊章惜名存而實廢嘉永平之能
行何禮文之誇靡竭鄙才以鋪張寓制作之初意今聖
人之在上心敬天而勤已揆古今之禮儀將以時而畢
舉倘承乏於詞臣誓洗心而頌美

蘭館賦

元
曾 策

豐沛興雲萬方受圖開重熙於奕葉著儉德之宏謨既

躬耕以勸勤豐御廩之儲需念化下之有道又繭館之
異區爾其館之為制也不莊不麗匪雕匪斲弗事金碧
弗崇丹堊髣髴太古棟宇初作溫溫房櫳肅肅幃箔海
色曉而分曙天光垂而下灼迨夫蟄戶啓封蠶蛸受風
司晨展日內官盛容詔閨中之麗質掇上林之芳叢伺
眠食於三泮奏成功於九重輟椒殿之清燕勤茲事之
親供匪好勞而惡逸期黼黻於聖躬爛日月之昭彰鬱
璀璨於山龍稽古象以制作粲天章之蒙茸於以迓鴻

禧延景命昭儉素示丕敬是以居之者必可嗣皂緇之
徽音贊之者又足以續辭輦之貞靜而後於斯館為稱
也夫何子雲舍是而賦長楊五柞之雄蓋堅無知而說
昭陽牆宇之盛遂使一代曠典僅紀於漢禮之足徵諸
儒摘之又以附會乎呂韋之月令吾嘗觀夫井幹麗譙
層城披香椒風嶢嶢而霞舉甘泉絢煥以雲翔炫金鋪
於繡戶煜朱彩於虹梁角道夾以縈紆周廬列以成行
迨後嗣之末造曾胡足與繭館而齊芳嗟夫神禹卑宮

黻冕致美堯階茅茨軒裳是理何帝王之恭儉華采衣
之靡靡豈不以文章者治體之由明服飾者等衰之攸
紀此繭館之為庸得以著名於漢氏之禮也猗歟皇元
聖繼神傳宮壺之內莫不有嫺虞任姒之德又豈可以
漢之繭館而並言方今聖皇御歷郊裡肇舉爛五雲之
披披罄八荒而咸覩鰥生未敢盡繭館之鋪張行且造
明堂而獻賦

帝苑農蠶賦

有序

明
廖道南

辛卯八月十七日恭遇皇上親祀帝社帝稷於西苑簡
命勲輔卿佐暨臣道南凡十一人充陪祀官禮成上御
無逸殿面諭錫宴既而周覽豳風亭駕始發臣猥以末
僚遭茲盛典天顏咫尺叨陪晉晝之榮帝眷殊常申錫
需雲之寵駿奔兢惕燕樂揄揚臣誠歡誠忭稽首頓首
上言伏以國之大事在祀與農民之厚生惟衣與食盖
耕桑為王業之本而土穀咸坤祗之靈稽古神農肇作
耒耜思文后稷率育來牟公劉古公紹厥勲王季文王

弘其緒惟成王守文武之基業故周公陳稼穡之艱難
在書則叙商之三宗以及於祖烈於詩則述豳之七月
而采其民風啓八百年有道之長遺千萬世無窮之利
厥後藉田廢而號公納牖敷言至於蠶績休而褒如厲
階興刺勸懲具在龜鑑攸存歷考垂訓之格言實為傳
心之要法茲蓋遇我皇上體天地之大生備聖神之至
德敦庸五禮郊廟之典告成軫恤三農軍國之需攸賴
敷求禹則徽煥堯章惟聖祖紹田功於中都之鄉惟文

皇啓邦土於西苑之地仰懷世德上感淵衷顧仁壽之
宮原可以樹桑而播穀御昭和之殿室於時撫景以揮
毫奎文燦爛乎龍光雲翰輝煌乎鳳翥對時育物相土
命官首營帝社帝稷之壇次建省耕省斂之所殿名無
逸恒操祇畏之心亭扁幽風益勵憂勤之志爰修蠶室
更築桑臺倉恒裕而百穀用登門迎和而諸祥畢至靈
鵲雙儀於皇闕誠哉孫子之昌嘉禾連穎於天田允矣
神祇之貺乃屆仲秋之月爰諏穀旦之辰慶平秩之西

成追報賽於前古禮文裁於聖制孔惠孔時樂律發乎
宸章盡善盡美至誠克享明德惟馨伏望保泰持謙令
終有俶履豐思豫永觀厥成建皇極以福庶民遠邁周
王之盛懷重華而光列祖永孚虞帝之休臣謹撰帝苑
農蠶賦賦曰

繫皇明之啓運肇農蠶以耕織惟王業其根本惟民生
其衣食曰無逸而乃逸茲先務之為急闢地利以無彊
法天道之不息惟我德祖爰卜京土衍顓頊之苗裔派

句容於江許惟我懿祖隱約田里邁種德於幽潛穆玄
風乎太始惟我熙祖渡淮寓泗履險危以多難垂令聞
於不世迨於淳皇乃遷東鄉崇朴茅茨感異麥場靈應
駢臻而載震載夙祥徵長發而俾熾俾昌篤生皇祖受
天之祜乃聖乃神乃文乃武風雲景從而三靈協助日
月貞明而五星順度惟歲壬辰鍾離之邨釋耒耜而造
邦歷百戰其績紛惟歲乙未金陵之地盡彊理而經野
崇九鼎其鼎負惟歲丙午奠璧園丘諭太子以稽事咨

農工之是憂惟歲壬子瘞琮方澤戒后妃以素服虞蠶
工之弗克惟歲戊申脈土發春躬耕藉田而噫嘻斯興
惟歲丁未禱雨致祭親涖雩壇而虔恭益至閱耘鍾山
乃步龍岡遵阡陌而於邁視襁褓其如傷觀穫後苑乃
召鑾坡輟警蹕而弗御詢菑畲之如何蓋我皇祖首物
冠倫積功累仁欽天禮神養賢牧民而佑啓億萬載之
太平者誠務農蠶為之本焉者也惟我皇上同符祖德
丕顯文謨丕承武烈修六府而重土穀叙九疇而爰稼

穡歲惟辛卯月惟季春太昊司令勾芒應辰條風時來而玄鳥降協氣日至而倉鷩鳴是月也日惟己丑木宿角垣乃駕鑾輅乃抗龍旂軫東作之伊始指西苑以來觀於時歷文祖之宮原思開創之舊業乃召輔臣乃召宗伯對時育物而胥豫胥游相土辨方而爰經爰畫爾乃御昭和之碧殿臨太液之清波宸翰飛灑於雲霞天章輝煥乎星河是即帝堯之間衢室而授民之時帝舜之訪總章而敕天之幾也是月也日惟辛卯土宿畢觜

乃諏筮氏灼元龜諧箬人揲泰著相陰陽之攸吉區原
隰之咸宜於時昭告於列祖宣令於百工乃召司徒乃
召司空遽師贊謀而土圭以測匠氏効力而水臬是從
爾乃營帝社以統五土營帝稷以統五穀敷施元始乎
乾化煦嫗貞成乎坤育是即周雅之歌冢土而為國祈
祀戴記之紀王社而為民介福也廼又建無逸殿於仁
壽宮之前棟隆元吉材良孔堅藻繪敦素結構聯縣中
揭獻皇農家之詩以彰先德之兢惕旁列周書無逸之

篇以述古人之艱難於殿之前亭曰幽風飾不過華制
不多崇奎圖赫奕鉅碑穹窿詠公劉之勤苦表姬旦之
精忠昭昭乎炳蔚如虎豹煌煌乎天矯如虬龍也廼又
建迎和門於仁壽宮之東璇題映旭散栳飛虹軒聳特
起周遭旁通仰穹端於泰清以達風露之氣俯壤倪於
泰寧以贊水土之功於門之南亭曰省耕平疇曠衍方
池湛清夙興自宮時往於亭鳩田畋其至喜勞農夫之
可矜霑霑乎翠華之光被鬱鬱乎黃茂之蔥菁也廼又

建恒裕倉於仁壽宮之北我黍與我稷翼翼其崇如
墉其比如櫛乃求千斯倉以供神明之祀乃求萬斯箱
以備軍國之實於倉之側亭曰省斂萬寶豐登百室克
瞻夜漏向晨宵衣待旦嘉平秩之西成幸粢明之足薦
忻忻乎免下民之怨咨蕩蕩乎孚上帝之申眷也其種
桑之園則於彼宮垣之西蔭綠樹之扶踈暢青陽之歲
蕤既培佳廩復翳茂楸蘿氏芟其繁蕪柞氏疏其荒蕪
其採桑之臺則於彼軒墀之陽躋崇基之靈峙攀柔條

之遠揚取彼曲植執此懿筐儉勤取則乎邠女莊恪遺
戒於魯姜其飼蠶之室則於彼殿庭之陰屈鳳輦於嘉
月集蠶婦之如雲叢箔班班密葉臻臻帝純服之所自
出后鞠衣之所由成其繅繭之館則於彼蠶室之區含
天駟之真精監織女之靈輝七襄成章三盆就絲西陵
氏創其緒業宛窳氏淑其範規是故坤儀靜專以亮乾
元之化陰教明章以宣泰陽之亨緬思古人實獲我心
葛覃樛木克成內治螽斯麟趾垂裕後昆其所關係者

大矣其所由來者遠矣猗歟盛哉我皇上之重農蠶以
為天下先也夫其成功於苑中也經始於春暮就緒於
秋仲樂庶民之子來歆百神之罔恫其中則東有萬春
麗春永壽長春接珍膳而五穀馨西有延壽景福安喜
仁和御延和而百祿多其外則東有樂成崇智涵碧翫
芳俯臨漪而鳧鷖翔北有仁智介福凝和承光望廣寒
而草樹香乃若金黿玉螭積翠堆雲星橋迢遞於滄溟
金露玉虹方壺瀛洲危亭屹屹於玄邱擁翠飛香太素

歲寒華楫吸嘖於紫壇遠趣會景澄波映輝黛梁曖曖
於翠微至於兔園之山龍洞之泉環珮琮琤乎石林珠
璣絡繹乎水簾鯨海之嶼鷗沙之渚菰苳參差乎流洲
芝蘭芳郁乎平圃是皆我文祖經營之豐址是故務本
之訓德音在耳颯颯乎萬善之紀也我宣廟游觀之靈
囿是故織婦之詞嘉謨如舊明明乎三接之晝也我皇
上尊祖敬宗參天兩地駿烈邁乎百王鴻猷徽於萬世
是故祈禮行於春也克慎厥始報禮行於秋也允成厥

終樂章裁於聖制儀節定於宸衷至止肅肅有來雍雍
武貂蟬而簪纓整飭文鵷鷺而環珮春容鳬鐘鼉鼓龍
遂鸞蕭鑑鏘其並奏彩翬丹籥朱干玉戚綴兆其來同
三獻方升百禮既崇主拜於前臣拜於後覲天顏於咫尺
誠動於此幾動於彼致帝祇之感通昔者韶鳳儀虞
神龍啓唐赤烏開周玄鳥生商德盛者其福備祥多者
其國昌我皇上體信達順建中致和天惟降康而載錫
甘露地不愛寶而屢清黃河宇甸疊呈夫瑞麥天田彌

獻夫嘉禾靈鵲雙翔帝座兆前星之曜郊禋特舉仙源
澄少海之波迺知一敬立萬善備矣二氣和萬物育矣
三農成萬事具矣四靈至萬神應矣五福膺萬祀永矣
臣拜稽首以矢其音歌曰帝德高明兮配天惟天資始
兮錫茲豐年帝德溥厚兮配地惟地資生兮登茲廣利
帝德祗慎兮法祖惟祖垂統兮申茲多祜帝德純孝兮
顯親惟親遺澤兮昭茲至文吁嗟農蠶兮帝苑西天施
地成兮萬國重熙噫嘻謨訓兮帝苑中祖澤親仁兮萬

世攸隆

勞酒賦

陳江總

在陽春之仲序覽具物之芳菲帥公卿而播百穀親耒耜而命三推開青壇於迴甸列翠幕於清沂乃遵執爵之典爰降食苹之讌豁朱鳥之高牕啓黃龍之抗殿奏帝鴻之萬舞動鈞天之九變顧曲私之亭育遞寒暑而徂遷謬陳力而策駘豈酬恩於暮年

御定歷代賦彙卷五十一